

PRO LOCO DOSSENA



PREMIO DOSSENA 2010

CONCORSO DI POESIA IN LINGUA BERGAMASCA

Alla memoria di Filippo Alcaini

24^a EDIZIONE

Martedì 10 de óst 2010

**Sagrato della Chiesa Arcipresbiterale Plebana
di San Giovanni Battista in Dossena**

1a classificata
Nostalgéa
di Rita ROSSI di Bergamo

Ghe rìe piö a stàt dré
te scàpet tröp de frèssa
lontà de mé.

Lassàt de banda i pöe
meticc i prim tachècc per isghingà,
m'indàa per i sentér
pröfömàcc di vint'agn,
te gh'è i öcc
pié de stüpur incantàcc de belèsse,
ol respìr delicàt,
ligér, quando söi sime
di mucc m'vardàa
la val in fiür,
e m'se fermàa estàtegh
coi sögn che mai i finìa.

Me sènte consömà de nostalgéa,
soféghe i mé pensér
in del löch di memòrie.
L'è 'l tép che piö nissü se spèta ...
Ègnem incóntra amò con töt 'l amùr,
“zoentü” te préghe,
fàm amò i care
prim de sbassà 'l sipare!

3a classificata
Bèpo del Rissöl
di Albino ZANELLA di Bergamo

A l'vegnia zó,
a ròta de còl,
coi sò saàte sfondade.
I braghe a tòch
e, sò la pèl bióta,
öna giaca ègia de soldàt.

I a ciamàa
ol Bèpo del Rissöl.

Nóter is-cetì m'gh'ia pura,
ma, töcc i dé, me l'ispetàa
scondicc dré 'l mür.
E lù, quando l'passàa,
l'ispalancàa fò i brass
e l'isgrignassàa.

Cóme 'l òrco di stòrie de la mama,
ol Bèpo del Rissöl!

Ma, de nòcc a l'pianzia
cóm'ü cà a la lùna:
i sò lamènc i riàa lontà
e i mame i ghe disia:
«Dórma car ol mé bé! L'è negóta!
A l'è dóma 'l Bèpo del Rissöl»

Dòpo, öna nòcc ...
Dóma la us del vènt ...

I l'à troàt la matina,
sò 'n sima, sóta la sésa,
apröv a la cassina,
coi sò saàte sfondade
e, sura öna méda de rüt,
la giaca de soldàt.

A l'gh'ia la fàcia nèta
e ü fiür in di mà.

5a classificata
Rosada d'amùr
di Gigi Medolago di Boltiere

Ó sèmpèr pensàt
che 'l amùr
a l'föss cóme la rosada,
che la tègn a màser i sentimènc
chèi piö pröfömàcc,
chèi de l'ànima.

Ma só rincurzìt
de la söcia che t'ó facc sufri,
quando ol fòss de la éta
l'è restàt sèns'àqua,
l'è stacc assé scaà
piö a fònd 'n del cör,
per fà saltà fò öna cascada,
de chèla rosada.

Quase töcc i dé
n'sa pùgia,
'n chèl'àqua nöa, che la diènta à,
che düra giornade,
ch'ì grónda
e ma sassia
quase töte i nòcc,
ü quach góte
i rèsta tecade
e i ma compagna
ömide,
ai cunfi de la éta.

4a classificata
La montagna la lücia ...
di Alessandro PELLEGRINI di Brembilla

La se n'è 'ndàcia chèla zét,

l'è pö turnada 'ndrì,

l'lücia la montagna,

l'è restada desperlì.

L'è drì a partì a' 'l ültem bergamì,

l'è tarde uramài mo la mia ülit capì ...

L'à trengutit bucù amàr,

e tante promèsse finide töte 'n mès al mar.

Lü l'ghe cridìa, ol bósch,

ol prat e i animài gl'ia la sò misciù,

ma l'à düsit tacà sö

al ciód la gàbia col magù.

La éta 'n montagna l'è düra,

e mès michèt de pà l'ia tröp póch

per fà de sentinèla ... a la natüra.

Chèl galantòm l' meritaa rispèt,

per agn mo l'à cunsideràt cóme

la röda de scòrta del carèt.

Adèss ai pé de la montagna töt a l'fà sito,

bósch, pracc, canài e mülatére i lücia i bergamì,

'n cuntrada, 'n di órcc e sö i rissöi

a l'crèss vigurùs i spì.

2a classificata

L'öltima zèrta de stram

di Renato ROCCA di Ponte Nossà

A l'gh'è ària de fiòca söl mut.
Sbrufi tröp zelàcc,
quase baline de giòss,
i pica i ölteme fòie passide
amò tacade ai piante del bósch.
Öna nebiolina legéra
fàcia de pas e de sònch,
la quarcia de bombàs ol paìs.
Paìs de montagna.

Da öna strécia,
inserada tra cà
che i se dà mà,
ön'ómbra sfurmada
da öna zèrta in spala
la à in vèrs a öna stala.
Öna zèrta de fòie
dovrade a fà stram.
S'la cönta tra lü 'l Gioàn
intàt che l'regula 'l bes-ciàm.

Ol món
a l's'è strefàcc,
ma lü a l'l'è lassàt indà
per la sò strada;
lü a l'gh'à i sò mucc,
ol sò bósch, ol sò prat,
la sò stala;
in del cör öna éta
che l'à mai ülit cambià.

I dis che l'è mat,
che l'parla coi ache,
che l'è restàt söl sò pass.
Lü l'grégna:
«Làssei cör, làssei scornàs».
In bóca öna mèsa sigala ...
a l'sa sèta pogiàt
a l'öltema zèrta de stram.

Premio speciale per la migliore opera su Dossena

Dosséna

di Luigi FURIA di Gorno

Dòss e sentér
O megn de rassa
Sentùr de minére
Saùr de paghére
È co Dosséna
Natüra incantada
Amùr a prima ésta.

Me par de sognà
In mèss ai tò cà
Atùren ai tò mucc.

Cara Dosséna
Angol de pas
Rèsta sèmpèr issé
Abocato di tò ècc.